

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Prošle nedjelje nastupilo je zimsko računanje vremena. Kazaljke na satovima su vraćene jedan sat unatrag. Nekome takva praksa odgovara a nekome ne. Mnogi se zbog toga žale a neki uzimaju zdravo za gotovo. Uglavnom, prividno se „skratio dan“.

Vjerujem da bi mnogi ili svi od nas željeli da vrijeme uistinu možemo vratiti nazad i ispraviti neke životne greške i krive poteze. Međutim, Gospodar vremena, Uzvišeni Allah odredio je da nitko to ne može činiti osim Njega i svi ljudi kao i sva ostala stvorenja plove rijekom vremena nizvodno i nikako uzvodno.

S toga je ovo dobra prilika za sve nas, da razmislimo o vremenu u kojem živimo, a koje nas svakog dana siječe poput sablje; o vremenu koje je pred nama i za koje se moramo dobro pripremiti; kao i o vremenu koje je već prošlo, iz kojeg treba da uzmemo pouku i da se pokajemo za učinjene greške, i radi boljeg danas a i radi boljeg sutra.

S tim u vezi nas naš Gospodar doziva: „**O vjemici,**

**bojte se Allaha i neka svako gleda šta će za sutra pripremiti! I bojte se Allaha! Allah je, zaista, dobro obaviješten o onome što vi radite.“** (El-Hašr, 18.)

Pod riječju „sutra“, Uzvišeni Allah ne podrazumijeva bukvalno sutra, u smislu da mi moramo danas raditi kako bismo sutra imali šta kupiti, pojesti, popiti, obući... To se podrazumijeva samo po sebi. Pod riječju „sutra“ Uzvišeni Allah podrazumijeva ono što će doći poslije smrti, odnosno, drugi svijet - svijet Berzaha i Ahireta.

Zašto Uzvišeni koristi termin „sutra“, a ne, recimo, „život poslije smrti“? Upravo zato što je smrt svakome od nas vrlo blizu, bili mi mladi ili stari, bolesni ili zdravi. I bez obzira koliko čovjek dugo živio, opet mu se na kraju čini da mu je život kratko trajao i da je proveo samo par trenutaka u ovom današnjem danu.

U vezi s tim se prenosi da su upitali jednog alima: „*Čemu se nadaš?*“, pa je on odgovorio: „*Ne dođe ni jedan novi mjesec, a da ne pomislim da ću u njemu umrijeti.*“ Zatim su upitali drugog alima čemu se on nada, pa je rekao: „*Ne dođe ni jedna nova sedmica, a da ne pomislim da ću u njoj umrijeti.*“ A zatim su trećeg alima upitali čemu se on nada, pa im je rekao: „*Kako da se nadam nečemu što nije u mojoj ruci?*“

Prema tome, braćo moja, svaki novi dan u kome osvanemo treba da doživimo kao poklon i još jednu priliku, koju ne smijemo propustiti, da uljepšamo svoje mjesto u Berzahu i na Ahiretu. Jer kada smrtni čas dođe, a nitko od nas ne zna kada će on doći, i kada pređemo granicu Berzaha, a potom u kaburu vidimo svoje mjesto koje nas čeka ili u Džennetu ili, ne daj Bože, u Džehennemu, poželjet ćemo da se vratimo na Dunjaluk i da iskoristimo poklonjeno vrijeme kako bismo što više dobrih djela učinili. Da bi dobri Allahovi robovi još veću deredžu (položaj) u Džennetu postigli i da bi loši Džehennem izbjegli. Međutim, tada je kasno, jer je Berzah granica preko koje se samo jednom može prijeći, odnosno, kada se prijeđe ne može se vratiti nazad. Čak ni šehidima, koji bi vrlo rado još koji život poklonili na Allahovom putu, nije dopušteno da se vrate.

Zato Uzvišeni Allah upozorava: „**Kad nekome od njih smrt dođe, on uzvikne: 'Gospodaru moj, vrati me da uradim kakvo dobro u onome što sam propustio!' – Nikada! To su riječi koje će on uzalud govoriti - pred njima će prepreka (Berzah) biti sve do dana kada će oživljeni biti.**“ (El-Mu'minun, 99-100.)

Osim navedenih, braćo moja draga, postoje još dvije kategorije ljudi koje će žaliti zbog

neiskorištenog vremena. Žalit će nemuslimani u Džehennemu kada vide kako Uzvišeni Allah spašava iz Džehennema muslimane koji su na polaganju računa imali više loših nego dobrih djela. Zažalit će što nisu prihvatili Islam, jer će neki muslimani samo privremeno biti u Džehennemu, a nemuslimani vječno. I žalit će vjernici u Džennetu kada budu vidjeli na kakvim deredžama su oni koji su Allaha stalno zikr činili (spominjali). Zažalit će za svakim trenutkom u kome nisu Allaha Dragog spomenuli.

**„Sve što je na ovome svijetu prolazno je, a ostat će jedino Lice tvoga Gospodara, Veličanstvenog i Plemenitog.“** (Er-Rahman, 26-27)

Svi ćemo mi umrijeti. I naši roditelji će umrijeti. I naša djeca će umrijeti. I njihova djeca će umrijeti. I naša braća i sestre, i naše amidže, daidže i tetke, i svi ljudi i svi džini i svi meleki - svi će umrijeti. I ova planeta i mjesec koji kruži oko nje će propasti, i Sunce će propasti i sve galaksije i cijeli svemir će propasti. Samo će Gospodar svjetova ostati. On, koji će Ahiret pripremiti, a onda nas tamo ponovo stvoriti i zatim nas o djelima, koja smo na Dunjaluku činili, pitati.

Zato, braćo i sestre, iskoristimo vrijeme koje imamo! Iskoristimo danas za bolje sutra! I

nemojmo biti zaboravni poput riba pa da pouke hutbe pamtimo do izlaska iz mesdžida ako i toliko. Evo jedne hikaje koja govori o tome: Jednog ramazanskog dana halifa Harun Rešid r.a., reče slugi Behlulu: „Otiđi na akšam namaz u džamiju i pozovi na iftar sve koji dođu na namaz.“ Nakon akšam namaza Behlul se pojavi sa nekoliko osoba, a Harun er-Rešid iznenađeno upita: „Što je ovo Behlule? Nisam li ti rekao da dovedeš na iftar sve koji dođu na namaz? Od toliko ljudi ti nisi doveo ni koliko je dovoljno da sjednu za jednu sofru!“ Behlul odgovori: “Ti si meni rekao da dovedem sve koji dođu na namaz, a ne sve koji dođu u džamiju. Nakon namaza stao sam pred džamijska vrata i svakog tko je izlazio upitao koju je suru imam učio na namazu. Odgovor na to znali su samo ovi koje sam doveo. Znači mnogo ih je došlo u džamiju, ali na namaz su došli samo ovi koji su tu.”

Molim Uzvišenog Allah da nas uputi i učvrsti na Pravom putu i podari da znamo cijeniti i koristiti svoje vrijeme.

Amin!

Hutba je temeljena na pisanju hfz. Midhat ef. Sejfića  
Prethodne hutbe potražite na našoj stranici:  
[www.medzlis-split.org](http://www.medzlis-split.org)  
Pripremio: Vahid ef. Hadžić Split, 03.11.2017.

ISLAMSKA ZAJEDNICA U HRVATSKOJ  
MEDŽLIS ISLAMSKE ZAJEDNICE SPLIT

## NAŠA PROLAZNOST



498